

Dogri Evening (NSD)

03-09-2026

खबरां

1. भारत ते बेल्जियम नै अगले 5एं बरें च दबक्खिया बपार गी दो गुणा करने पर सहमति जताई। प्रधानमंत्री नरेंद्र मोदी होरें नमीं दिल्ली च अपने बेल्जियम दे समकक्ष बार्ट दे वेवर हुंदे कन्नै गल्लबात कीती।
2. अक्षय उर्जा, साइबर अपराध ते कूटनीतिक प्रशिक्षण दे खेत्तर च भारत ते बेल्जियम बश्कार होए दस्तखत।
3. रक्षा मंत्री राजनाथ सिंह ते उंदे बेल्जियम दे हमरूतबा थियो फ्रैंकन होरें संवाद उच्च स्तरीय दैरे ते समर्थ निर्माण दे जरिये दबक्खिया रक्षा सरबंधें दा विस्ता कराने लेई प्रबिद्धता जताई।
4. खजाना मंत्री निर्मला सीतारमण होरें न्यूयार्क च उच्च स्तरीय कारोबारी गोलमेज पर निवेशकें कन्नै मलाटी कीती।
5. बिहार च गंगा नदी च पानी दा स्तर बदी गोआ जेदे करी नमें इलाकें च हाड़ दा खतरा बद्धा जा करदा ऐ।
6. बैडमिंटन च किदम्बी श्रीकांत नै कनाडा दे विक्टर लाई गी हराइयै शेन्जेन च चाइना मास्टर्स दे पुरुष एकल क्वार्टर फाइनल च थाहर पक्की कीती।

<><><><><><>

India-Belgium Agreement

भारत ते बेल्जियम नै अज्ज रक्षा सहयोग बारै आशय पत्र ते अक्षय उर्जा, साइबर अपराध ते कूटनीतिक सिखलाई दे क्षेत्र च ज्ञापन पत्रें सने केई समझौतें दा आपूं'चे आदान-प्रदान कीता। प्रधानमंत्री नरेंद्र मोदी होरें अज्ज दपैहरी नमीं दिल्ली च अपने बेल्जियम हमरूतबा बार्ट दे वेवर हुंदे कन्नै दबक्खिया गल्लबात कीती। दौनों लीडरें दबक्खी रिश्तें दे पूरे-पराते पहलुएं दे कन्नै-कन्नै आपसी हितें दे क्षेत्रीय ते वैश्विक मुद्दें पर चर्चा कीती। अपने प्रेस बयान च प्रधानमंत्री मोदी होरें आक्खेआ ऐ जे सांझे लोकतांत्रिक मूल्यें, बजार अर्थव्यवस्था, ते लोकें कन्नै लोकें दे रिश्तें भारत ते बेल्जियम गी कुदरती साझेदार बनावे ना। मोदी होरें याद कीता

जे उने दस बरै पैहलें बेलजियम दा दौरा लाया हा, ते खुशी जताई जे इस साझेदारी नै पिच्छले इक दहाके च उल्लेखनीय तरक्की कीती ऐ। प्रधानमंत्री होरें आक्खेआ जे अगले 5एं बरें च दौनें मुल्ले च बपार दोगुना होने दी हासल होई जाग। प्रधानमंत्री मोदी होरें आक्खेआ जे स्वच्छ ऊर्जा भविष्य ते भरोसेमंद आपूर्ति श्रृंखला दौनें राष्ट्रें लेई सांझी प्राथमिकतां ना। उनें अगें आक्खेआ जे अक्षय ऊर्जा सरबन्धी अज्ज हस्ताक्षर कीते गेदे एमओयू कन्नै स्थायित्व सहयोग गी नमीं गति थ्होग। मोदी होरें आक्खेआ जे दुनिया बड्डी उथल-पुथल दे दौर थमां गुजरा करदी ऐ ते दुनिया दे मते सारे हिस्सें च टकराव दी स्थिति बनी दी ऐ। उनें आक्खेआ जे अनिश्चितता हर क्षेत्र गी प्रभावित करा'रदी ऐ, चाहे ओ खाद्य पदार्थ होऐ, तेल होऐ जां सप्लाई चेना। उनें इस गल्लै उप्पर जोर भरेआ जे भारत दी अर्थव्यवस्था नै इस चुनौतीपूर्ण माहौल च बी अपनी गति बनाई रक्खी ऐ। इस थमां पैहले अज्ज सवेरे बेलजियम दे प्रधानमंत्री होरें राजघाट दा दौरा लाया ते महात्मा गांधी होरें'गी श्रद्धांजलि दित्ती। बेलजियम दे प्रधानमंत्री कल रातीं त्रौं दिनें दे भारत दौरे पर नमीं दिल्ली पुज्जे हे। उं'दे कन्नै बेलजियम दे रक्षा मंत्री थियो फ्रैंकन बी ऐ हे। इस थमां पैहले अज्ज रक्षा मंत्री राजनाथ सिंह होरें अपने बेलजियम दे समकक्ष थियो फ्रैंकन हुंदे कन्नै प्रतिनिधिमंडल स्तर दी गल्लबात कीती। उनें आक्खेआ जे भारत ते बेलजियम दे आपसी सम्मान, लोकतांत्रिक मूल्यें ते नियमें उप्पर आधारित वैश्विक व्यवस्था लेई सांझी प्रतिबद्धता उप्पर बने दे गर्मजोशी ते स्थाई रिश्ते ना। बेलजियम दे रक्षा मंत्री थियो फ्रैंकन होरें भारत-बेलजियम दी दोस्ती गी अगें बधाने उप्पर जोर दित्ता। इस दौरान दौनें मंत्रिण रक्षा सहयोग गल्लबात, उच्च स्तरीय दौरे, सिखलाई ते क्षमता निर्माण दे राणें द्विपक्षीय रिश्ते गी बधाने पर सहमति जताई।

<><><><><><>

PM-Varanasi Flood

प्रधानमंत्री नरेंद्र मोदी होरें अज्ज अपने क्षेत्र वाराणसी च हाड़ दी स्थिति दा जायजा लैता। उनें हाड़ दी स्थिति बारै विस्तृत जानकारी हासल करने लेई जिला मजिस्ट्रेट सत्येंद्र कुमार हुंदे कन्नै टेलीफोन राणें गल्लबात कीती। उनें राहत शिविरें च कीते जा करदे बंदोबस्त बारै पुच्छ-गिच्छ कीती। प्रधानमंत्री होरें निर्देश दित्ते जे हाड़ राहत कम्में पर बरोबरी निगरानी रक्खी जा ते प्रभावित लोकें गी फौरन राहत दित्ती जा। मुख्मन्त्री योगी आदित्यनाथ होरें फरुखाबाद जिले दे हाड़ प्रभावित इलाकें दा ब्हाई सर्वेक्षण कीता।

<><><><><><>

FM-Growth Story

खजाना मंत्री निर्मला सीतारमण होंरें न्यूयार्क च उच्च स्तरीय कारोबारी गोलमेज पर निवेशकें गी भारत दी सुधारें दी अगुवाई आहली तरक्की-बाहे बक्खी पुट्टी गेदी गैंऽ बारै दस्सेआ। सीतारमण होंरें 2026-27 दी पहली तिमाही च भारत दी 7 इशारिया 8 फीसद आर्थिक विकास ते रास-पंजी लाने दे बेहतर म्हौल गी उजागर करदे होई आखेआ जे भारत कुल संसारी गडबडी ते चुनौतिएं दे बावजूद बी दुनिया दी सारें शा मती तेजी कन्नै बदने-मठोने आहली बड्डी अर्थ बवस्था जारी ऐ। खजाना मंत्री होंरें आखेआ जे दिवालियापन ते संहिता सने सुधारें कन्नै प्रधानमंत्री नरेंद्र मोदी हुंदे मार्गदर्शन च मती नियामक निश्चतता, अपुपालन च सहूलियत ते कागजी पत्रें आहले कम्में च कमी आई ऐ।

<><><><><><>

Gadkari-Automobile Industry

शिडक परिवहन ते राजमार्ग मंत्री नितिन गडकरी होंरें इस गल्लै पर जोर भरेआ ऐ जे भारत च नवाचार गुणवत्ता ते कीमतें च प्रतिस्पर्धा कन्नै चलाए जा करदे दुनिया दे नंबर इक आटोमोबाइल उद्योग बनने दी समर्थ ऐ। ओहू नमीं दिल्ली च सोसायटी आफ इंडियन आटोमोबाइल मैन्यु फैक्चर्स दे 66में सलाना अधिवेशन गी संबोधित करा करदे हे। उनें आखेआ जे एहू खेत्तर मुल्लै दे जीएसटी गुराई च तकरीबन 15 फीसद योगदान दिंदा ऐ ते तकरीबन 4 करोड़ प्रत्यक्ष ते अप्रत्यक्ष नौकरियें दा समर्थन करदा ऐ।

<><><><><><>

India France- Textile

भारत ते फ्रांस नै कपड़ा फैशन खेत्तरें च सहयोग गी होर मजबूत कीता ऐ जेदे चलदे वैश्विक बजारें च भारती कपड़े ते कारीगरी गी बढावा देने लेई दौनें पेरिस च नमें समझौतें पर दस्तखत कीते न। भारत ट्रोक्स ट्रेड फेडरेशन ते प्रीमियर विजन सोसायटी एनोनिम नै इक समझौता पत्रें दा कपड़ा मंत्रालय दे सचिव नीलम शमी राव हुंदी मौजूदगी च आदान-प्रदान कीता। सोशल मीडिया पोस्ट च कपड़ा मंत्रालय नै आखेआ जे समझौता पत्र कन्नै प्रदर्शनियें बजार सरबन्धी सरबन्धें टिकाऊ सोर्सिंग ते ज्ञान दे आदान-प्रदान च सहयोग गी मजबूती थ्होगा।

<><><><><><>

ED-Search Action

प्रवर्तन निदेशालय नै अज्ज केंद्र सरकार दे नशामुक्त भारत अभियान दे तैहत दक्खनी भारत दे 4 राज्यें च 30 बक्ख-बक्ख ठकानें पर नशीले पदार्थें दी तस्करी ते ओहदे नै जुड़े दे पैहें दे लैन-देन दे मामलें च बड्डे पैमाने पर छापेमारी कीती ऐ।

<><><><><><>

UP-HPV Vaccination

उत्तर प्रदेश च सर्वाइल कैंसर कोला बचाव लेई HPV-टीकाकरण दा इक विशेष अभियान अज्जै थमां शुरु होआ ऐ। अज्ज 3 सितम्बर कोला लेइयै 17 सितम्बर धोड़ी एह अभियान समूलचे राज्य च चलाया जाहगा। एह अभियान इस अवधि दौरान राज्य दे सब्भनें 75एं जिले च चलोग जेहदे तैहत 14 बरें कोला घट्ट उम्मी दिएं कोई 10 लक्ख बच्चिएं गी HPV दा टीका लाने दा लक्ष मित्थेआ गेदा ऐ। लखनऊ दे CMO डाक्टर एन.बी. सिंह होरें इस उम्र वर्ग दिएं बच्चिएं ते उन्दे माता-पिता अगगे अपील कीती ऐ कि ओ अगगे औन त अपनिएं बच्चिएं गी एह टीका लोआन। एह टीका महिलाएं च होई सकने आहले सर्वाइकल कैंसर दे मामलें गी रोकने च 90 प्रतिशत बचाऽ सुरक्षा दिंदा ऐ। एह टीका 9 कोला लेइयै 14 बरे धोड़ी दी उम्मी च लोआना कारी दा साबत होंदा ऐ ते शरीरै च सुरक्षित ढंगै नै एंटीबॉडी बनाइयै लम्मे समें तगर वायरस कन्नै लड़ने दी ताकत दिंदा ऐ।

<><><><><><>

Bihar-Water Level

नेपाल ते उप्परले इलाकें च भारी बरखा दे चलदे बिहार च गंगा, गंडक ते कोसी नदियें च पानी दा स्तर उप्परोतली बधदा जा करदा ऐ जेहदे कारण केई जिलें च हाड़ दा गंभीर खतरा पैदा होई गेदा ऐ पटना, बक्सर, भागलपुर ते वैशाली च गंगा दा पानी तेजिया कन्नै बधा करदा ऐ ते झिगड़े इलाकें च पानी जमा होई गेदा ऐ। नेपाल थमां पानी छोड़े जाने दे कारण गंडक ते कोसी नदिएं च पानी उप्परोतली बधदा जा'रदा ऐ। प्रशासन नै झिगड़े इलाकें च रौहने आहले लोकें गी सुरक्षित थाहरें उठी जाने दी सलाह दिती ऐ।

<><><><><><>

T.N Assembly

तमिलनाडू असैम्बली नै अज्ज आम सहमति कन्नै इक ऐतिहासिक प्रस्ताव पास कीता ऐ जेह्दे च केंद्र सरकार अगगे तमिल भाशा गी मद्रास हाई कोर्ट दी प्रमुख भाशा दे रूप च मानता देने दा आग्रह कीता गेआ ऐ। मुख्मन्त्री सी जोसेफ विजय हुंदे आसेआ पेश कीते गेदे इस प्रस्ताव गी बरोधी धड़ें डीएमके ते ए.आई.ए.डी.एम.के सने सबनें सियासी दलें विजन कुसै बरोध दे अपना समर्थन दित्ता।

<><><><><><>

ISRO-EOS -05

भारतीय अंतरिक्ष अनुसंधान संगठन इसरो दे अध्यक्ष वी. नारायणन होरें आखेआ ऐ कि धरती पर तक्क रखने आहले उपग्रैह EOS-05 दा प्रक्षेपण कल श्री हरिकोटा च सतीष धवन अंतरिक्ष केन्द्र थमां कीता जाहगा। नारायणन होरें दस्सेआ जे EOS-05 भलेयां अज्जै –कल्लै दी किस्मा दा अवलोकन उपग्रैह ऐ जेह्दा मजूदा समें च धरती दी कक्षा च स्थापत कीते जाने आहला भारत दा पैहला इमेजिंग उपग्रैह ऐ। इमेजिंग उपग्रैह माहनू आसेआ त्यार कीता गेदा इक ऐसा उपग्रैह होंदा ऐ जेह्दा गासै परां होइयै धरती दी सतह जां होरनें ग्रैहें दियां फोटुआं खिच्चने दा कम्म करदा ऐ। इसी EOS यानि अर्थ आब्ज़रवेशन सैटेलाइट बी आखेआ जंदा ऐ। नारायणन होरें दस्सेआ जे एह अभियान भारत दी पृथ्वी पर तक्क रखने दी छमता गी होर मजबूत करोग। कल तिरुमला च श्री वेंकटेश्वर स्वामी मंदरै च पूजा –अर्चना करने दे बाद मीडिया कन्नै गल्लबात करदे होई उ'नें एह जानकारी दिती। पूजा शा पहले उ'नें GSLV-F-17 राकेट दे मॉडल गी भगवान वेंकटेश्वर हुंदे चरणे च अर्पित कीता।

<><><><><><>

Property-Attached

जम्मू-कश्मीर पुलसै बारामूला जिले च बंदिश आहले आतंकी गुट जमात-ए-इस्लामी कन्नै जुड़ी दिएं केई संपत्तिएं गी अटैच कीता ऐ जिं'दे च इक स्कूल बी शामिल ऐ। पुलसै गैर-कनूनी गतिविधिएं दी रोकथाम सरबन्धी कानून तैहत कार्रवाई करदे होई सबनें कनूनी औपचारिकताएं गी पूरा करने परैन्त द'उं इमारतें, 6 हट्टिएं ते उत्तरी कश्मीर दे सोपोर इलाके च 2 कनाल जिमीं बी अटैच कीती ऐ। सोपोर पुलस थाने च दर्ज इक मामले दी जांच दरान एह सारी संपत्तियां सामने आइयां। बड़ी बरीकी कन्नै कीती गेदी जांच, अधिकारिक ते राजस्व रिकार्डें गी खरी चाल्ली खंगालने ते सरबन्धत अधिकारिएं दी तसदीक दे बाद गै इ'नें संपत्तिएं ते जमात-ए-इस्लामी दे बश्कार सरबन्धें बारै पता लग्गी सकेआ ऐ।

Janamashtami

जम्मू खित्ते च कल जन्माष्टमी दा पावन पर्व धार्मिक जोश ते खुशी कन्नै मनाया जाह्ग। इस उत्सव लेई जम्मू दे बजारें गी शैल स्नाकड़े ढंगै कन्नै सजाया गेदा ऐ ते बजारें च खूब रौनक बी लब्बा करदी ऐ। लोक, इस उत्सव लेई भगवान श्री कृष्ण हुं'दी मूर्तिएं, बस्तर, साज-श्रृंगार दे समेयान, मठेआइयों ते पूजा आस्तै लोड़चदे होर दुए समेयान वगैरा दी बड़े चाएं-चाएं खरीददारी करा'रदे न। बक्ख-बक्ख जिला प्रशासनें ते पुलसै बी सुरक्षा सने होर बी दुए सब्बै लोड़चदे बंदोस्त जकीनी बनाए दे न। तोआई सनातन धर्म सभा किशतवाड़ ने श्रद्धालुएं गी गुजारश कीती ऐ जे ओहू पूरे धार्मिक जोश ते खुशी कन्नै इस पर्व दा जश्न मनान।

<><><><><><>

Badminton

भारती शटलर किदांबी श्रीकांत नै शानदार प्रदर्शन करदे होई चाइना मास्टर्स सुपर 750 बैडमिंटन टूर्नामेंट दे क्वाटर फाइनल च अपनी थाहर पक्की करी लैती ऐ। दुनिया दे 34में नंबर दे खडारी श्रीकांत नै प्री क्वाटरफाइनल च बड्डा उलट-फेर करदे होई कनाडा दे दुनिया दे 9में नंबर दे खडारी विक्टर लाई गी 21-18, 21-19 कन्नै हराई दित्ता।

<><><><><><>